



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

3. Kalenderwoche – ab 15. Januar 2011

Windordiensd gewinnd

Kenn Sie Beamdnmigahdo? Das is, währ sisch als erschdor beweeschn dud, dähr had vorlorn!

So ähnlich is das ooch midm Windordiensd. Un isch gloobe, dor Windordiensd had gewonn! Ja, einfach schdillehaldn un wardn, bis dor Schnee schmelzn dud. Das dud eischendlich immor irschendwann glabbn - schbädesdens im Friehling! Nee, da had dor Windor keene Schangse - dor Windordiensd darf ehm bloß nisch zu frieh de Närvn vorliern un anfang zu waggln.

Windordiensd heeßd ja iebrischens Windordiensd, weilor am Windor guhd vordienst. Nee, dor Vordienst beim Windordiensd lieschd off dor Hand. Dähr wird ja nach Kilomedor gereschnd. Un Kilomedor kannsde ehm off dor Audobahn machn un off de Landschdraßn. Dazu noch e baar Haubdschdraßn in dor Schdadt... - un dann kenn de Räumfahrzeusche hin un hähr sausn mid schdolz nach ohm offgerischdede Schilde!

Nee, bloß nisch an eenor Greizung schdehnbleim un anfang dähn Schnee wegzuschiehm. Das bringd doch keene Bunkde! Kilomedor mussde machn!

Ährlisch - un ohne Iebordreibung! - isch hab die ganzn Daache, wo dor Windor mid Schnee zugeschlachn hadde, da habsch soviel Schneeräumfahrzeusche gesähn... finf sechs Schdig in eenor halm Schdunde... kleene, große... abor nisch eens had geräumd. Die sinn bloß off dor schneeberäumdn Schdraße Badrouillje gefahrn. Nee, die sinn dann nisch irschendwann von dor Haubdschdraße ins Wohngebiet abgebochn, odor zum Beischbiel am Gleisdreiegg ma in de Hardmannschdraße nein! Odor in Grien Winkl odor in de Johann-Rischdor-Schraße odor ... odor...

Nee, da lach doch ieborall Schnee! Da gabs doch voreisde Schburrinn! Da dud kee Räumfahrzeusch neinfahrn! Weil se schlau sinn. Kilomedor!

Kurz bevor dann das Dauweddor eingesedzd had, wie de Weddor fresche im Färnsehn vorrausgesachd ham, da hammse noch schnell e baar Baubedriebe beoffdrachd, e bißl Schnee wegzubaggorn. Zum Beischbiel im Hedwischhof. Dähr Schnee dord, had eischendlich niemand geschdeerd, abor de Baubedriebe haddn ehm e bißl Windorvordiensd!

Windordiensd dud villeischd ooch e bißl wie Grieschdiensd fungsjoniehrn - wensde ieborlähm willsd, mussde dor Gefahr ausm Wesche gehn. Griesch is dord gefährlich, wo geschossn wern dud, un Windor is dord gefährlich, wos schnein dud. Moddo: Meide de Flogge, mach de Flogge! Een großn Vordeel had dor Windordiensd ja eischendlich dursch de Weddor fresche! De Weddorvorhärsachn sin ja heidzudaache dährardisch guhd, also die sachn ja dähn Schnee un ooch Eisglädde off de Schdunde genau voraus... ooch de Orde, wo de Floggn hinfalln dun... da kann sisch ehm dor Windordiensd reschdzeitisch in Sischorheid bring!

Villeischd sollte mor werglich de Weddor fresche alle einschberrn - nisch bloß dähn Kachlmann! - dann däde dor Windor geschn dähn Windordiensd widdor eene fähre Schangse ham!

Eduard Sachsenmeyer